

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

RAMADHAN MUBARAK

26 Mai 2017
(29 Shabaan 1438 AH)

Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « Valeur Ramadhan »:

Mentions Spéciale:

1. *Alhamdulillah Summa Alhamdulillah*, aujourd'hui le 26 Mai 2017, nous Masjid dans Mayotte fine vine officiellement opérationel kot nous bane membres pé faire zot premier Jummah dans le nouveau Masjid : **Hazrat Ummul Mumineen Fazli Amena Mosque**. Et hier, le 25 Mai 2017, nous bane membres ti rassembler pour ene réunion spéciale et à l'occasion fine ena ene déjeuner collectif. *Alhamdulillah Summa Alhamdulillah*, nous bane membres à Mayotte bien dynamique. Bane (comploteurs) là fine jette ene tolle, mais Allah fine élève plusieurs tolles dans so place et maintenant nous bane membres fine réussi gagne zot Masjid. Masjid capave tolle ; sa fer nous retourne dans l'époque Nabi Kareem Hazrat Muhammad (saws) kot Masjid ti en di bois, et recouvert avec branche et feuilles tame, mais *Imaan* (la foi) ti béton.

2. Aujourd'hui par la grâce d'Allah, sa faire 9 ans ki Allah fine élève moi officiellement comme So Khalifatullah et le Imaam-é-Inquilaab. Dans la nuit de 26 Mai 2008, après Maghrib & Esha, Allah ti envoye la révélation lor moi et ti fer moi proclame moi officiellement comme le Khalifatullah de sa l'époque là. Alors le 26 Mai, li ene date et mois historique dans l'histoire du Jamaat Ul Sahih Al Islam, et couma zot tout conné, le 26 Mai aussi ti date kot nous bien-aimé Hazrat Massih Maoud Mirza Ghulam Ahmad (as) ti intékaal. Ki Allah toujours préserve li dans fraicheur de Jannat et accorde li So l'amour et So Miséricorde infini. *Ameen*.
3. Et aujourd'hui le 26 Mai 2017, sa fer 5 ans ki nous Chaîne Youtube « **Sahih al Islam** » ti lancer. *Alhamdulillah, Summa Alhamdulillah*.

Annonces:

1. Par la grâce d'Allah, Mukarram Amir Dr. Thahir Saheb et bane les autres membres ki ensemble pé fer ene grand travail dans le Nord de Kerala. Zot fine prend ene initiative pou distribuer nous bane pamphlets avec tous bane dimounes dans le Nord. *Alhamdulillah*, zot fine réuni dans zot zéffore.
2. Et ena aussi nous frère K.P Shamsuddin Saheb ki fine prend initiative distribuer nous bane pamphlets (lor l'importance de la Venue d'ene Khalifatullah) dans bane Masjid. Li fine prend le risque aller seule, mais à ce moment là, c'est Allah ki ti avec li. *Alhamdulillah*.
3. Et aussi, Mukarram Amir Jamaluddin Saheb, dans le sud de Kerala ti inviter dans ene conférence pou représente le Jamaat Ul Sahih Al Islam lor le thème « **Trois Talaq** ». Ti ena bane grand personnalités ki ti présents. Li fine expose mo bane écrits et discours lor le sujet là-bas – basé lor le Quran – devant l'audience et la plus grande partie de bane dimounes fine apprécier, excepter certains bane musulmans ki fine négatif surtout kan zot fine conne à propos le Jamaat Ul Sahih Al Islam et nous vue lor le Talaq, parski zot, zot pour le trois Talaq ene sel coup (même par email ou message portable), mais *Alhamdulillah*, le Amir Saheb kan fine présente sa devant l'audience, bane dimounes (surtout bane non-musulmans) fine bien apprécier, et kot li fine même lire devant zot mo biographie ene tant ki ene humble serviteur et messenger d'Allah.
4. **Et en tant ki le Chef Spirituel de la Jamaat Ul Sahih Al Islam, moi et mo Jamaat nous condamne complètement bane actes terroristes ki fine arriver à Manchester en Angleterre sa semaine là. Mo fine fini cause lor là longuement dans ene discours, ki *Insha-Allah* pou poster lor nous website en langue locale en audio (et aussi traduction).**

VALEUR RAMADHAN

Ramadhan c'est ene très grand *Nia'mat* ki Allah Ta'ala fine accorde nous, bane musulmans. Nous pou reconnaite sa faveur là seulement kan nous pour donne li tout so valeur, sinon Ramadhan pour aller-vini sans ki nous fine profiter de li pleinement. Bane Hadiths ki mo pou présenter devant zot montrer bane vertus de Ramadhan. Fine rapporter par Abu Masud al-Gifari (ra) dans ene Hadith ki Hazrat Muhammad (saws) fine dire: « *Si mo Ummah réalise vraiment valeur Ramadhan, zot pou désirer ki l'année entier passe dans Ramadhan.* »

Dans ene l'autre Hadith rapporté par Salman (ra): « *Dernier jour Shabaan, Nabi Kareem (saws) fine faire ene causerie ; li fine dire : Ô bane musulmans, ene grand mois pé vini, ene mois rempli avec bénédictions. Dans sa mois là ena ene la nuit ki so valeur plisse ki mille mois. C'est ene mois kot Allah Ta'ala fine faire Roza (carême) Faraz pendant la journée et Li fine faire Namaz (Nafil) du soir (e.g. **Tahajjud ki Allah mentionner dans Quran, et ene excellent innovation comme le Tarawee kot Hazrat Umar ti envie réuni tous bane musulmans ensam sous ene seul Imaam et non pas divisé – et d'ailleurs c'est sa l'esprit d'unité là ki bizin reste vivant kot tous bane musulmans faudé réuni zot ensam, sous ene sel Imaam, surtout Imaam ki Allah fine élever pou zot, ene Imaam-é-Inquilaab, ene Khalifatullah, kot faudé pas ena division et plusieurs sectes mais ki au contraire, pareil couma dans philosophie de Hazrat Umar (ra) pou réuni tous bane dimounes ki ti pé fer sakaine so Namaz ene côté et fer zot fine ensam et fer Namaz derrière ene sel Imaam** Sunnah pendant la nuit. Celui ki essaye pour rapprocher avec Allah à travers bane actions Nafil dans sa mois là pour gagne même récompense bane actions Faraz de bane les autres mois. Et celui ki faire ene action Faraz dans sa mois là pour gagne récompense soixante-dix Faraz de bane les autres mois. Certainement c'est ene mois Sabr (patience) et récompense vrai Sabr, c'est ene mois kot Rizaq (provision) ene musulman augmenter. Celui ki donne Iftaar ene Rozédaar, li pou gagne pardon so péchés, li pou libérer avec difé Jahannam et li pou gagne autant récompense ki sa Rozédaar là, sans ki récompense Rozédaar là diminuer en aucaine façon.* »

Aussitôt nous fine dire : « *Ô Messenger d'Allah, nous tout, nous péna moyens pour donne Iftaar ene Rozédaar.* » Nabi Kareem (saws) fine réponde : « *Allah (swt) accorde même récompense pour celui ki donne ene Rozédaar ene tame, un peu de l'eau ou ene gorgée du lait pour Iftaar. Dans premier partie sa mois là, Allah (swt) verse So bénédictions, dans deuxième partie, Allah accorde So pardon et dans dernier partie Li libère nous dépi difé Jahannam. Celui ki diminuer fardeau so travailleur dans sa mois là, Allah pou pardonne li et pou protège li dépi Jahannam.* »

« Dans sa mois là, pratique en abondance quatre kitchoses, deux là-dans pour le plaisir Allah, deux lézot nécessaires pour zot-même. Deux kitchoses pour plaisir d'Allah, c'est récité beaucoup : « *Laa Ilaaha Illallah* » et faire beaucoup *Istigfaar*. Et deux kitchoses nécessaires pour zot-même, c'est demande *Jannat* et rode protection contre difé *Jahannam*. »

« Celui ki donne ene *Rozédaar* un peu de l'eau pour *Iftaar*, Allah Ta'ala pour faire li boire dépi mo la fontaine après quoi jamais li pas pour gagne soif *ziska* ki li rentre dans *Jannat*. » (Baihaqi, Ibné Hibbaan).

Ene *Rozédaar* bizin prend 6 précautions kan li garde *Roza*. Abu Ubaidah (ra) rapporté : « Mo fine tanne *Rasullullah* (saws) dire : « *Roza*, c'est ene bouclier ki protège ene dimoune aussi longtemps ki li pas déchire sa protection là. » (Ibné Majah, Nisaï, Hakim).

Dans même façon ki ene « bouclier » protège ene dimoune, *Roza* protège *Insaan* (dimoune) dépi so l'ennemi déclaré, *Shaytaan*. Dans lézot *Hadiths*, nous apprane ki *Roza* protège contre punition Allah Ta'ala dans *Aakhirat* (l'au-delà) et aussi li ene protection contre difé *Jahannam* (l'enfer). Ene fois, ene kikaine fine demande *Rasullullah* (saws) : « *Ki kitchose ki casse Roza ?* » Li fine réponde : « *Cause menti, faire Ghibat et la guerre et disputer pour nannié ditout.* »

Alor, kan ou analyse sa parole du Saint Prophète (saws) là, li fine dire ki cause menti, faire *Ghibat* (cause causer dimoune derrière zot lédos, cause mauvais lor zot), la guerre ou disputer pou nannié ditout annule *Roza* pareil couma manger et boire casse *Roza* kot li complètement perdi tout so bénédiction et récompense de *Roza*, tout sa sacrifice ki li fine faire, lévé de bonheur le matin et alle d'après bane prescriptions ki Allah et So *Rassool* fine dire, dernier moment, à cause bane zaffaires ki fine défanne, li perdi tout. Et lor là, li commette ene péché grave et surtout dans sa mois béni là (c'est-à-dire, *Ramadhan*).

Donc, ena six précaution ki nous bizin prend kan nous garde *Roza* :

1. La personne bizin protège so regard et pas guette aucaine kitchose *Haraam* (ki défendu). Nous bien-aimé prophète (saws) fine dire : « *Regard, li couma ene flèche ki sorti dépi Shaytane.* » Celui ki par frayeur pou Allah, protège so regard contre le mal (li pas guette ene kitchose ki défanne), même dans ou bane causer avec ou bane camarades, ki li lor téléphone, portable, email ; ou bizin faire bien attention, attention Allah déracine sa la grain la moutarde la foi ki dans ou lécoeur et surtout si Allah fine choisir ou pou travail pour So *Deen* (religion) et ou, ou pé faire ou vouayou dans ou façon d'agir. Ou, ou bizin maintenir ou distance avec tout saki

Haraam et garde ou dignité ki Allah fine donne ou et Rasullullah (saws) dire, si ou garde ene telle dignité et statut ki Allah fine donne ou, bé Allah pour donne ou ene telle la force dans ou *Imaan* (la foi) ki li pou ressenti goût et douceur *Imaan* dans profondeur so lécoeur.

2. Ene dimoune bizin protège so la langue dépi tout kitchose Haraam couma cause menti, conversation inutile, *Ghibat*, discussion, zouré, etc. Dans Bukhari, nous lire ki Roza c'est ene bouclier pou ene Rozédaar. Pou sa raison là, bane ki pé garde Roza bizin évite tout causer inutile, faire bouffon, discuter, etc. Si ene dimoune pé commence disputer avec nous, nous dire li tout simplement : « *Mo pé garde Roza* » ou « *Mo Roza (carême)* ». En d'autres mots, faudré pas nous commence ene discussion nous-même et si ene l'autre dimoune commence discuter avec nous, faudré pas nous rentre là-dans.

Dans l'époque Nabi Kareem (saws), deux madames ti pé garde Roza et zot ti pé souffert tellement avec la faim ki zot pas ti pé capave tini et zot ti près pou mort. Bane Sahaba (ra) ki fine alle là-bas fine donne zot ene bol et dire zot vomi là-dans. Kan zot fine vomi, ti ena bane ti morceau la chair et du sang. Bane Sahaba (ra) ti bien étonner et Nabi Kareem (saws) fine dire : « *Zot fine commence Roza avec nourriture Halal, mais zot fine consomme Haraam kan zot fine faire Ghibat bane dimounes.* » Li clair dépi sa Hadith là ki *Ghibat* faire Roza vine bien difficile pour supporter. Pour sa raison là, tous les deux madames ti près pou mort. En fait, tout mauvais action faire Roza vine pli difficile. L'expérience montrer ki pour bane serviteurs sincères et dévoués (bane *Muttaqiin*), Roza pas difficile, tandis ki pour bane dimounes ki faire beaucoup péchés, Roza vine bien dure.

Sa Khutba là pas termine ici. Mo pou bizin arrête là-même à cause faute de temps et bane membres bizin retourne dans zot travail. Mo faire duah avec Allah ki Li donne moi l'occasion pour contigner le même Khutba Jummah la semaine prochaine, *Insha-Allah*. Si mo pour continuer li pou trop longue surtout kot bizin prend six précautions kan nous garde Roza et mo fine cause seulement lor 2 précautions. *Insha-Allah*, la semaine prochaine mo pour contigner.

Mo tenir à souhaite zot tous ene **Ramadhan Mubarak**. Ki Allah faire zot Mubarak pendant sa mois béni ki pé attane nous à bras ouvert. En retour nous aussi nous bizin ouvert nous lébras et serre bien fort sa invité extraordinaire ki Allah fine envoyer spécialement pou nous là. C'est vraiment ene trésor ki Allah fine accorde nous, et c'est à nous maintenant pou servi sa trésor là dans meilleure façon ki exister, et meilleure façon c'est dans suivre Sunnah nous Nabi Kareem Hazrat Muhammad (saws). *Insha-Allah, Ameen*.